

七

錄

齋

文

鈔

道充為貴論

天之所以與我者豈偶然哉降衷恒性率之而為道統於心具於身而散見于日用行事推之而經世宰物無所處而不當此固不必與勢位較崇卑者也有學者希心人爵而義利之界不分往往有舍道崇欲以微遜于勢位之崇高者吾見其惑也說在周子之論貴也曰君子以道充為貴今夫置身朝廷之上拜爵受祿莫之與京者大丈夫得志與時者之所為也貴之在外者不出戶庭之中而進德脩業快然無憾于一心者士君子獨善其身者之所為也道之在內者也在外者或得或否

時數有不可知在內者為所得為反身初無不足此其輕重大小之間可不辨而知今試有人為居公輔之位脩鼎鉉之任而窺其中則學有未成名有未立德行有未著經濟有未優徒以閭里榮華博庸夫孺子之稱說其可以為貴乎其不可以為貴乎又試有人為名不登于有司行不聞於廊廟而考其素則樂先王之道荷古聖之傳志天民之行脩大人之業雖草茅未出已具師相帝王之全量其可以為貴乎其不可以為貴乎夫貴存乎遇者也而道則足于己者也以分土列爵為尊以策名委質為榮者庸俗之淺見也以輔世長民為尊

以道高德厚為良貴者學者之所當自勵也古之君子  
閉戶深思望道未見不希心於遇合之來不役志於功  
名之路仁義忠信樂善不倦而天爵之崇無殊于公卿  
大夫矣居天下之廣居而移氣移體不假夫宮室車馬  
衣服之奉矣有諸中者日新富貴貴於外者為寔輝光  
進而履盛而登朝受爵無加于蕭然不與之初退而屏  
處而弦誦居稽快然有與我周旋之樂蓋即神明之蘊  
蓄已等于堂陛之尊嚴更不待觀光為天子之師虎說  
折諸侯之氣始形其巍巍氣象也而謂世俗之所謂顯  
榮赫奕者尚足與之相擬哉不然道未積于厥躬而徒

以貴自豪也不知其自處何等矣

歸奇於扚以象閏論

且理有一定而數有不齊故天時人事之間每有盈餘之所積惟於其所不齊者而有所以置之則奇零之數得有所歸乃不至參錯而搖夫一定之理如大易揲蓍求卦之法所謂歸奇於扚以象閏者信乎其為盡變之道也蓋揲蓍之法既分四十九策為二而又掛一于左手小指間則左右兩手所執不必定二十四策也既取兩手之策四四數之則左右必有所餘此所謂奇也夫奇因數之餘苟以為餘而置之不用則是所取之策有偶而無奇天地之氣有因陰而無陽也豈理也哉乃聖

人操著之法於不齊之中得一定之用化裁通變以盡其妙於是就所操四數之餘取而置諸左手中三指之兩間而著策之奇乃有所歸而不至廢之於無用故易有又明著之曰歸奇於扚云夫操著之法皆出于自然既取象於兩儀取象於三才又取象於四時則奇策之餘豈漫然而無所象者蓋四時運行有其常度而氣盈朔虛天之不能泯其不齊之數故聖人敬天勤民定時成歲必于十二月之外制三年一閏之法凡以使積分之差得歸其餘而四氣之節候乃一定而不易然則操著而歸奇於扚亦使策數所餘有所歸而多寡可核耳

其曰象閏無二理也總之著之為用廣大精微無所不  
備後人因策而求其變因數而嘆其妙誠于象閏之說  
講明而切究之則於歸奇之說可不煩言而解矣



禮以養人為本論

且夫禮者天所秩也而即緣人情以為端聖王知之用是率天下於日用不知之中而優柔厭飫俾得邀善遠罪於其間自刑名法術之說起則或有以舊坊為無所用而棄之者是直所謂敢於殺人而不敢於養人也然則禮以養人為本果何說哉蓋嘗論之自有天地以來物生必蒙蒙不可以不養故受之以需自需而訟而師而比而小畜與履此禮所由來之大凡也上古之世汙尊而坏飲故禮始諸飲食衣食足而後知廉耻知廉耻而後重犯法夫是以老有所終幼有所長而無大札疵

孺之患此養人之一說也非直此也大司徒以五禮防  
萬民之偽而教之中大宗伯亦云地產作陰德以中禮  
防之誠重其源誠適其性也夫君令而臣恭父坐而子  
立此倫常之自然而無所強者不如是則心不安而情  
亦有所鬱而未暢故曰勞苦恭敬政所以養安也况夫  
禮至則不乖禮至則不暴無乖與暴斯刑可措而樂可  
興焉此又養人之一說也由前之說是萬物有欲而莫  
不有以饜其求也所謂小人樂得其欲者也由後之說  
是萬物有道而莫不有以協其則也所謂君子樂得其  
道者也明乎此者可以知禮意矣夫人但知論養人於

姑息噢咻之中則將疑禮為相妨之具而豈知養之必  
出於禮也哉但知求禮於繁文縟節之間則又將以為  
束縛之物而豈知其本之不外夫養也哉甚矣其善言  
禮也

戰於長勺論

孟子曰春秋無義戰彼善於此則有之是故二百四十二年之間書朝書聘書會盟書征伐皆有微言大義存乎其間而書戰則未有進而予之者然則長勺之戰又何以稱焉蓋春秋之法勤王則予之救災卹鄰則予之非時不書勞民不書誠以兵凶戰危必也臨事而懼好謀而成戰則必克而後可以論戰彼曹劌者惡足以語此然則長勺之書夫子何取乎爾曰齊師伐我則師不興於魯而興於齊可知矣公將戰而劌未可則劌非輕敵自用而可與行三軍可知矣觀其論戰豈非已知

彼而得虛者實之實者虛之之道者哉故是役也可以  
論戰不然將舉國之師以授齊是輕士卒而羞軍國魯  
之不敵也明矣然則夫子非予魯也幸之也非予剋也  
危之也夫亦猶是存魯之意也若以為春秋之法豈有  
當於勤王之舉與救災卹隣之大義乎故論戰於春秋  
當以孟氏為斷

駕幸五臺山詩序

臣聞山川封禪神功垂虞帝之書河嶽懷宗時邁著周王之頌盛事光昭乎簡牒至誠感應乎神人況乎法界珠林自竺乾而遠播琳宮梵宇遍震且以遙傳洵是靈山斯稱佛土欽惟我

皇上參天兩地邁帝超王六位時乘握乾符而耀金鏡三辰叶慶沛解澤而御璿圖闕從來未闢之山河踰梓嶺榆谿之北開自古未開之疆域越流沙蟠木之西濟濟乎侯尉之一同洋々乎聲教之四訖乃邊陲當萬國來同之日正

聖母開七旬萬壽之年哉

皇上乃念雲代清涼之名山寔為文殊利之與宅臺  
懷苑裏曾現真容曼殊床前永流法乳峯堆翠鬢一山  
具五嶽之形林蔭娑羅七寶綴三珠之樹矧其境連恒  
鎮地接

神京不隔千里之山川長拱萬年之

宮闕曩于歲曾駭

仙輿固已布地賜金廣煥鴈堂之彩挾天敷落永生驚  
嶺之光矣茲者六呂司春三光啓瑞紫微南映滋灝氣  
於九霄青旂西巡扇和風於二月峯頭瑞雪迎瑞靄以

俱融谷口祥雲拂天香而自裊黎民鼓腹祝

聖壽之如天梵衆傾心荷

皇恩之似海而我

皇上天顏日霽惠澤深為

慈闈而祈壽流霞永酌仙泉傍

安輦以承歡彩繡遙分山翠蒼髭黃髮盡稽首而雲屯

西墅東臬聽歡聲之雷動仰

龍光而雀躍萬年欣有道之祥迎

鸞輅以鳧趨億載晉無疆之慶臣泰闢下士楚澤微貧

粗習詞章欣逢



明盛昨歲恭迎

玉輅仰和

天章燦爛微輝難借光華於日月  
呻吟末學詎窺渾噩  
於典謨幸睹

六龍重

臨三晉傾耳與人之誦側身野老之儔  
嘉澤均沾朽木  
尚蒸為朱菌陽和煦被寒葵亦貢其丹心  
爰申蟲鳥之  
吟希同華祝敬獻岡陵之頌聊附衢歌

皇太后七旬萬壽詩序

我

皇清受

天命撫有四方萬國

神聖繼序睦親錫類至於

宮庭之中起化之原燕翼之本如雅詩所稱太姜太妊  
太姒之德于今為烈是用天錫純嘏綿遠靈長不懈益  
隆維

皇上御極之二十有六年恭逢

皇太后七旬萬壽孝慈克洽鴻慶疊呈乃於仲冬朔二

十五日聖節

皇上躬率群臣奉表行慶賀禮先

勅所司具禮儀以聞當是時湛恩汪濊羣生沾濡凡在  
覆載之內無遠邇小大各以其職來獻而文學之士臺  
垣之長貳咸得以其稱願之私作為詩歌以揚鴻庥介  
禔福竊聞昔者明王以孝治天下自生民以來克紹克  
彰久而彌昌者未有如今日之盛者也臣舊叨侍從曾  
貳陪京曾不自揣固陋用偶切聲偶拜舞歡呼以自附  
于途巷歌呼之末

聖駕南巡詩序

皇帝御極之二十有七年斗杓東指玉輅南巡閱河淮  
江海之波歷齊魯越吳之境明流秀嶂

翠華曾駐之鄉岸柳曜花

天筆留題之處旌旂重沓乃閱三巡父老懷

恩又經六載先是

詔書屢下供億不煩灑掃畧整夫

行宮儲侍悉取諸

內府

殊恩預沛惠問遠傳賜復者數年截漕者鉅萬地無遠

近任丁男海戶悲以次而均除通有後先舉舊賦新租  
俱同時而豁免杏花雨足家々香熟黃梁菖葉春深處  
屢啄餘紅粒于是六龍雷動七校山呼倣唐狩之仲春  
值虞巡之甲子雞翹鷺輦拂梅柳以爭輝繡柱珠簾映  
川巖而一色哉

皇上躬扶

屬幔敬侍

龍輶指點湖上上娛

色笑香煙馥々人懷祝

嘏之忱興頌揚々戶奏迎

鑾之曲乃

念蒼茫澤國淵淼河流包四瀆以稱尊滙百川而為長  
秋風瓠子幾費芻蕘春漲桃花興歌竹箭

重腫一覽特授指麾

睿筭無遺竟收全局隄如虹偃障洪澤以安瀾波走雷  
聲順雲梯而向若若乃尖山東望雪練如飛潮勢西來  
銀濤陵立魚莊解舍人家則環水而居龍沫蛟涎閱歲  
而薦飢屢告爰觀移夫

玉趾用籌畫乎金隄築堰分塘殺萬里狂瀾之勢寧焚  
截竹破三年築舍之謀凡茲疏濬親裁實具導水導山

之智故尔川河遠涉無非民飢民溺之心夫豈徒汾水  
秋風揚中流之簫鼓渭城春雨回關道之鑾輿也哉維  
時慶烟繞官瑞日霽野望去珠璣翠葆到處皆春行來  
帳殿雲帆其間不夜森騰麥隴都分望  
幸之光江鳥山花搃帶承

恩之意由是

絲綸疊沛愷澤均沾商引加而海島之征人咸聞添灶  
闕津達而舵樓之販婦不嘆停橈頌鎮帛以溫生歡騰  
鳩杖闢園扉而草滿罪赦雞竿念舊臣則賜額賜珎拜  
寵光於江渚慰侍從則予休予沐傳

聖德於家山沼漾青芹廣選環橋之士階翻紅藥廣綸  
猷璞之人大法小廉吏立春冰之上荷受執戟人遊化  
宇之中以至故陵之松柏蒼然重修曩勺  
至聖之靈牆宛在虔振鐘鏞凡此日無窮無盡之  
深恩悉從來未見未聞之

曠典也臣忝列清班恭逢盛事形容盛德詎能繪日月  
之光紀載洪休聊以附壤衢之歌咏云爾



皇太后萬壽詩序

臣伏觀我

國家至化昭洽景運溥龐大烈耿光高邁三五今古所  
頌紀牒所傳聲名燭照未有倫比蓋若是之隆也

皇上德侔乾坤治冠姚姒明堂之上疊々穆々宇宙之  
內熙々淳々大孝備于

一人懽心洽于萬國欽惟

皇太后元吉正位睿聖儀天寶徽美號典重而彌寧景  
福上祥嘏純而愈盛溫清之禮肅于宮中尊親之至達  
于天下

皇上祇々翼翼仰春暉奉慈豫者朝夕左右固已通乎  
神明光于四海矣重光紀歲月當黃鐘恭逢

聖母毓瑞之昌期爰昭太和集慶之嘉會

皇上怡々祇敬用祝慈寧萬壽之釐而侑南山上壽之  
娛者孝思崇薦無不洽備四封之外六合之內殷心悅  
志奔走鼓舞偕來闕下覃敷誠懃隨

聖天子捧觴稱賀者如海之歸而雲之委是時也天地  
為之增明日月為之增麗山川草木為之爭榮而敷秀  
人物景象為之加融而含潤蓋孝德之大與鴻禧元祉  
之茂厚敷博相與充周而布濩以致此炳鑠於樂也臣

隨諸臣之後歡喜揚溢不能自己謹効周史為四言詩  
八章、八句深愧不文故抒其誠情云爾詩曰惟

聖凝命受天之祐既泰而亨亦大且豫悠久成物保定  
孔固蒸、茂、純熙誕布純熙惟何得一以正乾坤域  
中載寧載靜世長如春物遂其性壽宇宏啓 化並

願瞻壽宇上下覆幬泉飲其醴露飲其清樂愷萬方叶  
於簫韶與和氣遊至德永昭淳和湯流昌符相應

帝錫萬福祐我

慈聖穰、浩、山崇海盛日升月恒四時為柄

皇帝至孝穆矣允孚愉、在躬

慈聖是娛其典顯鏘其文鴻鋪於宮於庭德教涵濡  
皇帝至孝百禮備洽朝

慈寧宮整肅 散旌旗旄龍鳳匝祥開芝房三華  
九葉

皇帝至孝至孝備矣悉帥萬邦以祝瑞紀梯航九澤莫  
不咸至拜稽嵩呼

慈聖燕喜燕喜有慶萬年無疆洪恩流敷愷澤風翔延  
及群生樂壽且康壤謳衢歌地久天長

聖駕南巡詩序

欽惟

皇上保合太和治化翔洽中外禔福遐邇蒙庥特於御極之二十七年三舉

南巡之典先是

皇太后七旬萬壽薄海臣民同遊慶宇湛恩汪濊洽髓淪肌其願稱慈壽而覲日月之光華者延頸嚮風匪伊朝夕

皇上重違臣民祝嘏之悃爰于孟春陬吉敬奉皇太后安輿以行復先期頒

詔旨申誡百司嚴屬車之約束禁供帳之華靡儲侍悉資于內府絲粟不取乎民間蓋

皇上之愛民如此其至也維時黃流底定江海安瀾一切善後事宜尚仰賴

聖訓指示而三吳兩浙吏治官方民風士習尤時屢霽表謨

詔諭惟冀勤求寔政宣達羣情蓋

皇上之國治如此其殷也而且

豐恩疊沛下逮大小臣工賜復蠲租養年肆赦綸音丕煥萬衆歡呼伏見翠華所過巷舞衢歌自通都大邑之

聖祖仁皇帝久道化成屢巡南服我

皇上敬承家法後先輝映堯舜之風動時雍從容以治  
唐哉皇哉蔑以加于此矣臣久侍綸扉涵浴

聖澤雖年已及邁而詠歌盛事臣職所宜敬撰鄙詞三  
十章聊附於康衢老人擊壤謳歌之末

李太白詩注序

註古人書慮聞見不博也尤慮其識不精既博且精又慮心不虛不公有疑勿闕有誤曲為之解風騷後詩至李杜齊名方駕一如飛行絕跡垂雲馭風之仙一如萬象不同化工肖物之聖觀止矣蔑以加矣後學因元相誌杜墓抑李揚杜遂乃議論滋繁妄分軒輊詎知少陵生平心服明推為無敵為不羣即後此才高力厚起衰八代之昌黎固合贊以光燄萬丈深概流落人間者僅分泰山豪豈而先笑撼大樹不自量之蚍蜉乎哉兩集本非手定後人蒐羅採摭篇章遞增其中時有真膺叅



錯轉寓偽舛李集更多蓋自寶應元年往依族子陽冰  
得疾以卒遂塋當塗青山東麓陽冰序草堂集十卷即  
云當時著作十喪其九今所存者皆得之他人魏顗序  
翰林集二卷亦云上元末偶得於絳此即劉全白碣記  
所謂集無定卷家家有之者也至宋時宜黃樂史始輯  
別集常山宗敏求廣哀遺文始合為三十卷南豐曾鞏  
始考定先後次第太白本末惟諸序誌記范瑋二碑及  
舊唐新唐二書可証本詩世遠事湮疑謬雜出寧得免  
焉而兩集之有注也一榮一枯斯又不可言者註杜自  
宗至今名氏更僕難數後出多所因考辨易覈去取易

嚴然且必殫精神需歲月盡彙群籍以折其衷說始有  
當若李集解有可見之註止楊蕭胡氏三家今欲廣為  
訂正與註杜較工拙不亦難易懸隔太甚乎憶余自幼  
好誦李杜詩苦於不能盡解往在都中友朋聚談聞有  
優劣李杜者余曰杜誠不可及矣自李而外可與杜頡  
頏者誰歟必謂李不如杜一在學行甚正一在流離造  
次不忘國猶有說焉然李云受氣有本性不為外物遷  
又云我志在刪述垂輝映千春又云天地皆得一澹然  
四海清此其胸襟與自許稷契者何以異始見賞許公  
後見奇賀監居山東為竹溪六逸遊長安為醉中八仙

識汾陽于行間折力士旌殿上輕富貴如塵土樂山水  
以逍遙嗜酒慕仙浩然自放即遭危困未見其憂豈非  
天際真人之邀不可攀者耶談者始稍稍息今來武林  
得見此編持論平正其輯三家去短從長援引本本原  
原斟酌至慎固陋如余向所不解今漸解之則知此編  
實為太白功臣也

山西鄉試錄序

竊惟

國家以科目取士即周禮三年大比之制而經義一體  
代孔曾思孟以立言所崇者正所託者尊引天下聰明  
材俊之心思使之根柢經史沉潜理奧粹然一出於儒  
者之言又程之以二三場驗其淵博之才通達之識學  
者誠能湛深經術留心當世之務一出其言而德行道  
藝胥于是乎見不啻形之取影響之答聲分判毫釐不  
可假借故我

朝百數十餘年以來振興涵育文教光昭名臣鉅儒後

先輩出類能毗贊盛治黼黻隆平山右稱天下春河聲  
嶽色震蕩磅礴蔚為人才况密邇神京

文命所敷觀聽倍切辛巳之春

翠華西幸握瑜懷瑾之士迎鑾祝嘏復得親炙

聖人之光華踴躍歡欣喁喁藹藹是天地祥和之氣與  
人心愉樂之誠交鬯旁符而畢達文治之盛本於氣運  
之昌詎不信歟而臣等得操一日之柄衡量其短長竊  
喜三晉人士郁郁彬彬應試諸體多博大昌明之象和  
平溫厚之音而不褻夫喧囂焦殺詭僻險澀之陋習于  
以見此邦風氣之美而

聖朝培養之久且深也臣等壹志齊心和衷校閱敬體  
我

皇上志賢聖志言孔孟言之肯定其中乙以期不詭于  
道而合乎文章之規矩諸生倘果能益培養其學識澡  
雪其身心以靜候

朝廷之登選則于明體達用之寔吉人吉士之咏庶幾  
其有合焉而臣等幸值昌期恭逢盛典竊附以人事君  
之義藉手以報

聖主一日之知是又私心之所厚幸也夫惟時蒞茲土  
者例得備言

宣南邸舍書目序

前明嘉靖

間六世祖鳳居公宰並陽舉天下

清官第一歸惟載書數舟隆萬以後淮郡徵文獻者必  
首推吾家明季徭役繁興漕政大壞衛藉丁男逃竄四  
出吾家族姓北遷齊豫南入潁亳者皆一去不返家室  
分崩蕩析曷問藏書耶我

朝治漕恤丁士民復故業康熙間先曾祖鶴緱徵君以  
博學名當世與徐健菴果亭昆仲自幼結文字之知迨  
健菴歸田同游洞庭書局得傳是樓書目復稍稍聚集  
蕞殘後又分而為七先大夫暨叔父蘊村先生前後入

翰林寓輦下淮濱老屋數椽封閉數十年乾隆乙丑先  
大夫乞假歸則棟折墻圯器物書籍所謂七之一者又  
百不存四三丁亥秋予服闋入都時弟紫坪亦之官吳  
興各携所常讀書以出一區之宅已易他姓僅留詠素  
齋六間堆積故籍至甲午秋八月十九日黃河決老壩  
口水灌入城吾家傍城西北隅尤低下堂室內水深五  
六尺許所存故書盡付波臣逾月遣急足取出則皆膠  
濕霉黥如煤如泥乃悉投之東流至是而先並陽公舊  
本乃蕩然無隻字存可勝慨哉今年夏邸舍曝書兒姪  
彙錄書目閱之有感於心因舉往事告之即題其卷端



噫焚林而寶一枝竭澤而蓄一鱗殆不堪回首矣

荆檀堂花間甲乙序

戊寅之春予客古沛城荒署冷野無青草丹陽荆子檀  
堂自江上來暇日出所著花間甲乙一編相示排纂精  
當前詳悉花譜而附以歷代之典實諸家之歌詞裁緝  
去取間別具手眼又皆手自抄錄銀鈎鉄畫丹黃燦然  
可謂藝圃之平章羣卉之行祕書矣而復冠以所自為  
賦序諸文驚才艷筆絕類離倫如入波斯湖之肆遊帝  
王之宮珊瑚瑇瑁木難火齊蒼梧文貝琅玕之珠五色  
雲母三珠之樹鮫綃蜀錦東絹西劉冰蠶之繭火浣之  
布鞣鞞如巨栗者莫不林立山積千態萬狀駭目怵心

而不能名其實而作者洋洋纒纒行所無事則又如鍛  
氏之鑄物大冶氏之範金荆揚所貢嚴水所珍毗騫之  
器樂安之豆驪山之鏹鍾山之燭赤崖桂林之鏐錫華  
陽黑水之鏐鐵醯町扭揚無雷之銀若耶龍門碣石之  
銅赤而上青而下鳴於山涌於泉者無所不有無所不  
化噫可不謂沉博絕麗陸離光怪者歟橙堂負曠世才  
於書無不窺足跡半天下北遊燕趙南浮彭蠡過洞庭  
踰嶺渡瀘浸淫於山水之助生平著述哀然等身此固  
其一斑也予以羈栖泗上相見恨晚每酒闌燭跋展匣  
開槭儼坐我芙蓉之城萬花之谷而不知其身之猶在

荒洲澤國中

也

陳北泉四書文稿序

歲壬寅予乞假返淮上北泉歿已逾期一哭於殯堂再哭於墓門其子汝猷一日持巨冊盈尺皆北泉遺文乞為序會以紫坪新逝無好懷未之報也然已心諾之矣彈指五年至丙午春北泉從弟同春居都下將梓其兄制藝行世載申前請並出示國子先生常大怡庭所為序予讀之作而嘆曰怡庭之言盡之矣北泉一生親師取友興高而情深與其文之獨得深造四十年中忻戚離合之跡靡不在吾目而動吾心讀罷惆悵歎歎益不能已於言予自髫齡隨官居京師之日益多 先大夫

庭訓嚴肅不敢出戶外年逾冠未私交一友及乙丑由  
楚湘歸里門衢術不辨始出應童子試是時里門多高  
才生名噪一時都大殫精於三場帖括之業子史騷選  
問之若不屑措意獨北泉博雅嗜古又喜為崑體詩及  
駢儷之文持論特與予合同時楊子益能宗浙東黃氏  
之學好為北宋蘇黃古詩頗不羈西人者皆睚眦予數  
年中聲氣漸廣文會之友亦漸衆而我三人嗜好特同  
又同居城南皆喜飲酒遂無日不聚故有城南三子之  
稱每酒酣嘆惜大言誕語俯視一切忽忽不知其樂也  
丁卯秋聞報罷益併力為詩長謠短歌日有酬倡老嫗

懸癭小婢巨屨徃徃背古錦而運詩筒季冬集胡賓南  
兄弟齋中文譙罷漏三下各散而予三人忽興發登北  
城由東而南叩紫霄宮門不開遂登唐程將軍知節墓  
其踞其頂歌登高邱而望遠海其聲大而遠益能又左  
右手指畫大河以南至大江以北山川起伏形勢一縱  
一橫語不休老僕一人捉鐙卧草根僵凍欲死風過燭  
滅仰視月明萬里寒星吐芒大如斗搖搖欲墜寺林棲  
鷗啾啾驚怖盡翻巢側翅斜飛以去城狐水獸簌簌拍  
拍哀聲四起三人乃相與扶携行歌直至宴花楼下歸  
予七錄齋中共擁檠絮橫一榻卧甫向晨各以手蹟面

而歸其書館嗟乎疇昔之豪情勝致屈指不勝數如昨日事耳不數年間諸君子遂各登科仕宦遊歷四出於是聚散死生之感無歲無之至乙酉九月遭先大夫大故同人悲慕不已奉木主於勺湖草堂歲時采蘋灌酒以志不忘迄于今又二十有餘年矣北泉初仕江西移廣西所至有循聲悅直不合於上官而口碑在民間予聞之桂林陳比部蘭森言最悉歸田後南北音問猶通今墓未殆拱矣益能亦于乙未卒于豐邑之廣文任徐人思之今尚有讀其遺文而樂道其風節者嗟乎昔年昆弟今日山邱逝者不留來日苦少子自去年中風



濕蹣跚窮步耳聾齒豁握兩尋雙亦非復故吾矣春雪  
初晴餘寒尚溼矮几披卷儼對故人覺執鞭之慕與掛  
劍之悲茫茫交集凡卷中一評一注丹青烟烟皆昔年  
風雨西窓含毫欲腐時情事然已如前因昔夢不可尋  
究如飄風過耳野馬眩目不可捉搦墨燥紙盡擱筆惘  
然為惆悵者久之雖然止泉考訂經史述作甚富謂是  
一編者遂足盡其抵蘊乎哉

儲玉函館閣集序

風雅之道代各殊趨尊唐祖宋守一師之傳往往如方  
圓之不相入惟試帖一體千年以來宗尚無異則以程  
式有條格不能以私意別創門戶弔奇詭也然自兩科  
以詩取士士黃口髮未燥輒妃青配白塗澤風華爭鳴  
能詩識者或以為風雅憂何也蓋不求之源流正變而  
專視為弋獲名場之具則雖經義史料亦且揣合形似  
如巽巖制科題目之編昔人嘆為尊經而經亡者其弊  
正相等吾友玉函生陽羨風雅之邦江左稱文章華闕  
者必首推儲氏玉函弱冠即以詩名大江南北所著緘

石齋前後各集如璚璜銜牙之音黼黻纂組之采鏗然  
而金和誦然而玉節其胚胎于先澤而醞釀于詩書卷  
軸者深也入翰林後應館課作試帖凡百餘篇則又歛  
才就法因物付形意窺于象先而神悟于言表昔彥和  
論文衷于隱秀士衡稱詩歸于麗則讀王函此編殆有  
合焉近年改官考功吏事益繁劇而散衙手一編不置  
長吟短咏歲成一集蓋其性之所好而有不克自禁者  
予與王函締交三世都下寓址尤相近過從頻數每同  
年文酒之會王函必先至詩必先成座客傳觀或為之  
閣筆今將梓其試帖以應館閣先輩之求因相與論此

體非揣合形似者可偽為讀者其繹三唐以來相傳不  
易之格而未可以妃青配白塗澤風華者遂謂盡試帖  
之能事也

駁案新編序

律一成而不易例因時以制宜讞獄之道盡於斯二者而已至情偽百變非三尺所能該則上比下比以協於中此歷年舊案亦用刑之主臬也顧援引成案例禁禁嚴者誠恐移情附案矜深覈以為聰明務姑息以惠奸慝致有覆盆漏網開竒請他比之端故大為之坊耳予逐隊西曹十年於茲仰見我

皇上如天好生化成久道部省大小庶獄悉陳

睿覽無微不至其中閱實矜疑一經

指示洞燭精微靡不權衡銖銖仁洽義昭合乎天經地

義愜乎人心之公好公惡而秋曹大小臣工恭承宸訓  
敬慎將事比事屬詞平反屢奏每駁一案定一例各出  
所見講明而切究之開惑剖蔽要皆關發律意例義之  
精微本經術而酌人情期乎乎中正平允而止昔漢時  
魏弱翁為相謂古今異制獨觀漢家故事取諸臣便宜  
章奏悉施行之因以大治則章奏之稱便宜者意即今  
所云案者是也顏師古述漢時決事集為令甲三百餘  
篇意即今刑曹成案者是也他若陳忠之決事比應劭  
之春秋決事比歷代皆有真書然則不愆不忘率由舊  
章前事者後事之師詎不信歟全君秋濤偕同曹諸君

子取近年駁案彙輯成編予讀之數過見其博採廣收  
芟繁提要按門排纂具有手眼極案情之變而惟齊非  
齊決律例之精而有倫有要斯其用意亦良深矣司牧  
者得是編而讀之即一案而通乎情法之準究心律令  
之源庶與以禮制刑以教祇德之微意肫然有合而非  
第為引證比附之取資也

伊守軌太守督濬文渠圖序

歲乙巳江省舉計典吾淮太守伊公循績懋著膺上考  
外臺卓薦會南省蘊隆告災數郡艱食大吏懇留公綜  
理而調劑之越三年丁未復遵

特旨保勝監司之任乃入覲於灤河

仙莊適予扈蹕塞外得把晤於直廬退而出督濬文渠  
一圖見示予披覽之次不禁肅然敬惻然感也憶公下  
車以來江淮間人述公之撫恤災黎開通大河及防隄  
拯溺諸大政凡瀕海沿河之區雖蛟涎魚沫中躬親相  
度靡不有履跡焉澤鴻溝鵠咸登衽席今之司牧出身



七錄齋文鈔

加民如公之視民事若已事積勞不勸歷久弥堅貌瘠  
而民肥者殆未易屈指數此一圖者第紀郡城濬渠疏  
淤之一節而履勘之確指跡之詳委任之得人與善後  
之有法遂能立除數十百年堙塞澱濁之害而貽奕禩  
清澈深通之利於是淮之士庶歡訢遊覽奔走於紅橋  
淶浪間頌聲交作永勒貞珉而一時傳諸圖繪形諸咏  
歌盈帙而未有已嗚呼士大夫存心于愛物於物必有  
所濟為其事而無其功者誠未之有矧以賢太守本實  
心行實政將欲措斯民於百世之安者耶憶十年前與  
公訂交於輦下聆其緒論即識其愛民如子之懷公春



送方冲寰序

甲申春二月直隸方制軍閻亭請廷發需次官吾友方子冲寰以州佐與是選既

陞見行有日矣二三合志之士相與惜其才悲其遇若重有憾於茲行者予竊以為不然夫士風之陋也艷科目之名薄民社之任及俯首就吏又僅恃堅策肥以為榮奔走捷給以為工而不知親民之責之重且備嗚呼其可恠也已況今三輔薦饑三年於茲矣特哺者遍海  
中流離者轉道左

聖天子蠲歲租發帑金明詔再三大吏存問俾無失所

今制軍之需員佐治固不啻為民請命之意而方子慷慨以行其亦讀書愛民之心有迫于懷抱不克自禁者耶古之備荒備于未荒之先今之拯荒拯于既荒之後朝廷蠲免之恩不患其不至而患有司之壅于告賑恤之典不患其不寬而患有火之屯其膏誠使長民者視國事如家事視斯民如吾之子若弟則所以上其狀陳其情起之溝中而衽席之者必有規畫區置維持調護之方而况素能稽古學道者乎方子負不世才踔厲風發于書無不觀不屑屑於章句訓詁之學處輦轂下不妄交勢利赫氣之場裘足弗入歌詩填詞落落自抒其

胸臆旁及篆籀八分刻劃繪染之藝無不精使出其一  
技以合今之卿大夫其通顯固可立致而一旦屈志以  
就茲行吾甚重方子之所志者之遠絕於流俗也而又  
何憾且悲耶雖然行志者匹夫之義而憐才者卿相之  
心吾聞方子初就選王司馬白齋先生嘆息於朝以為  
失館閣之選是誠有古大臣之風而予同年友朱子榆  
園為經營車馬行李至周且備俾方子即日就道竊以  
為不愧古良友之誼是皆足以傳也因贈方子之行而  
並書之

秋颿倡和集序

夫西風白露美人動刀尺之思南浦綠波才士多別離  
之賦況乎風塵瀕洞客懷本拙人間烟水蒼茫鄉夢偏  
繁天末燕臺秋老思歸楚尾之山路澤風高爭買吳娘  
之棹聽一聲欸乃客懷與江水同清歌兩字歸來詩思  
共秋雲俱淡爾其雲龍賦罷眼前多曠世之才金石盟  
堅塵外結忘年之契倡予和汝轉數見以彌鮮弔古懷  
人雖常言而亦妙蠟來雙屐行過李子臺邊酌滿一尊  
長喟魯連城下杜陵老去池頭宜我輩吟詩李白長流  
樓上更何人縱酒以故濡染大筆題來西蜀之牋絡繹

長謠寫遍東膠之紙也且夫德水城邊處處歎蛟涎龍  
沫微山湖外家家愁鴈汭鷗波茅屋無存絕少橋頭之  
宅稻梁何處空牽岸上之船所由惻愴傷懷大有春陵  
之感淒涼託詠聊同野老之哀而已若乃酒貫青州魚  
烹白小尊前多擊楫之歌枕上得扣舷之白對江山風  
月而入賦敲枰鬪茗之皆工談元而四座皆驚公真醉  
矣說鬼則一堂俱嘿姑妄言之是皆足解彼幽憂以故  
得成茲卷帙也噫嘻計程逾月知吾曹之此聚原竒得  
句盈編歎諸公之賦才特妙裁來雪蘭寧誇輞水之章  
寫向烏闌直壓松陵之集此日詞成幼婦聊題書畫之

舡他時唱遍伶人更畫旂亭之壁



申拂珊京兆九秋倡和詩序

九秋未老黃葉飄風三徑猶存金英泣露憶屈授衣之  
節倏過落帽之辰對彼名葩啟茲良讌傾來鑒落相逢  
南國英多倚遍關干背負東籬秋色訝新霜之乍點寒  
為花輕喜舊雨之重逢人如菊淡居然蘭渚何須絲竹  
之音恍入蘇門忽聽鳳鸞之響盞酒徒河朔雖云投轄  
于窮賓而詞客江南必藉扶輪于大雅麟毫獨染首出  
多篇蠟炬高燒傳觀坐客愛之成癖雅多香草之思興  
到徧佳拈畫浣花之韻勉諸公以晚節此義堪箴牽遠  
思于家園遙情欲訴才真十倍爭吟白傅之篇紙貴一

時競和陶公之句積之盈篋彙以成函盧王之奇藻紛  
飛皮陸之新詞競作撫斯卷也移我情焉夫九衢湏洞  
門前則車馬如流十月蕭涼林外之青紅盡槁乃載寒  
而載擷倡為蔣逌之遊信可詠而可誦、、、、  
公言託興聊寄清歡我謂必傳定成佳話看此日詞成  
幼婦寫遍烏絲知他時唱出伶人吟同白雪

新疆徵實錄序

歲甲戌予與椿園訂交於都門見其好讀書具明核之才後歷官數省足跡半天下至丙申之冬自新疆旋補官比部適與予同曹朝夕共几研讀餘暇輒縱談西域山川風土及沿革建置之顛末靡靡可聽如馬賓王之論事予爲其纂輯見聞彙爲叢編上以脩國史之采擇次亦足補地志山經之遺軼未半載而椿園出一卷示予題曰西域瑣記予讀之見其考覈精詳序事徵實凡準回西部之源流疆宇之交錯莫不豆分瓜剖秩然不紊昔予在館局承修西域圖志及同文志二書於

兩部之疆索素所究心披閱之次益信其博洽賅備為  
一代有用之書因謂椿園曰是瑣記云乎哉因改從今  
名且夫崑崙析支丕叙於夏氏狄韞肅慎來享於周京  
莫不以道道九夷八蠻昭一統之聲教焉然而規模有  
廣狹向化有淺深博駕馭之名者不可以語開疆闢土  
也存羈縻之志者不可以言懷德畏威也東西兩漢勒  
遠畧創非常子長孟堅一代鉅手作為紀傳第疆列國  
之名述傳聞之迹其於疆域分合之荆沙磧里至之數  
未詳一二焉即其搜求土物詭為異事竊譬葡萄天馬  
苜蓿外無聞也自時厥後俗殊政異地醜德齊大業開

邊通乎且末唐達西藏采及梵章自謂無前偉烈矣然  
外不能革車于之名內不聞隸司空之籍入貢無定歲  
駐鎮無重臣方冊所牒不皆實錄洪惟我

國朝版章式廓為從古所未有哉

聖主天樞高紮地絡宏包武成大定以來關門以外關  
地三萬里北斗以北西濊之西壁首綯髻四晴突鼻之  
侶莫不向風稽顙編名屬國于是定準部之版圖區回  
城之疆界撫其衆庶駐以京員數千里星使往來耕屯  
相望測晷影頒正朔通泉流同文字撈玉貢果食租衣  
稅分年入覲開闢以來未有惴伏馴擾若此之甚也今

觀樁園所輯嘉峪磬關直屬戶庭之內安西置府咸登  
職方之書其在天山之北而西者自巴里坤烏魯木齊  
至伊犁數千里凡古之伊吾柳城高昌烏孫蠕蠕突厥  
之地已盡於此矣其在天山之南而西者自關展庫車  
阿克蘇烏什喀什噶爾葉爾羌和闐所謂城廓三十六  
國如車師焉耆龜茲溫宿疏勒莎車于闐凡在天山之  
南南山之北葱嶺之東者地已盡於此矣至於西部之  
外則有左右哈薩克居準之西北東西布魯特居回之  
西北大小數十國無不星羅棋布四至八到愛曼戈壁  
聚米可數而考鏡原委誌其風土出產俾讀者一展卷

瞭然如在掌上信乎為卓然不朽之作而  
國家功德之隆聲教之訖亦因是而可識其概矣

刑部題名序

曩閱徐健菴憺園集載刑部題名碑記前後二首愛其  
文因考其時膺司寇之任者每以不克舉其姓氏為憾  
及予為比部郎訪問是碑投剔殆遍終不可得及詢之  
老輩始知健菴當年以兄弟先後掌禁紀其遭遇之隆  
止以意撰為碑文刊入集中實未嘗討論其人勒之於  
石也因思補為題名錄積年以來隨所披覽偶有所見  
輒為掌識久之遂成巨帙今歲在丁未扈從灤河  
直廬多暇重加纂輯按年排比自順治元年至乾隆五  
十二年挨次遞錄遂成此編披覽一過覺



聖代西曹文獻班班可考匪第前事可師抑亦以人為  
鑑惟是百數十年之久其人之科貫厯官記載未脩尚  
有待博雅者之增訂云

韓侯釣臺記

昔者飛熊入夢而周興鷹揚之績烈千古焉漢之韓侯  
即周之尚父也乃釣臺遺蹟亦幾與磻溪等異哉寒流  
片石其竟王侯將相階乎夫自漢初以迄今日代不知  
幾更矣欲求昔時之故宮陵寢渺然無復存者而斯臺  
也顧猶得於荒烟斷塹之濱浮沉出沒若呼王孫而唁  
焉嗚呼夫豈臺之為歟抑其流風梗槩固自有不朽於  
騷人壯士之心者而不係乎臺之存亡歟方侯潛踪釣  
侶朝夕不能自給監子出而侮之偶用於楚而又碌碌  
無以自展當斯時也其亦窮矣乃自歸身真主而沉慮

深謀氣壓一世三齊下羣雄掃呼吸風雷燭爍日月遂  
使強項三戶之基一朝漸滅而炎劉四百之祚垂手而  
定之可不謂奇才者耶獨奈何功成事殫而借譽假王  
始以雲夢繼以鐘室英雄百戰之身卒斃於殘婦人之  
手回首釣游之處竟與黃犬東門華亭鶴唳同腐心焉  
漢之酈恩不忍言也彼赤松高蹈其亦早見之矣侯何  
相恃之深乎悲哉夫以手提三尺之英主而望其如十  
三載觀兵之武王列土封功無嫌無疑此誠萬不得已  
數矣覽是臺也吾惜當日之竿頭未進也

巴縣義塚記

古者涵澤之制所以集枯藏朽憫稽骸免暴露也禮孟  
春之月掩骼薶胔宋元豐間陳向以朝官為開封使者  
斥官地塋無主骸骨八萬餘具每三千為一坎環以溝  
洫什伍其坎而圖表之蓋仁人君子之用心與育嬰養  
濟諸制並垂令典重慶為全蜀要衝三江環流一大都  
會士客流寓與夫商賈貿遷類皆捐鄉井千萬里輻輳  
于茲土其生也以客為家其死也遂棄塋焉淫雨霏霏  
峽流湍瀉軀骸所積隨波而去或炎曦蒸炙曝于城隅  
目不忍睹行道者心惻也乾隆三年戊午代州郎公莅

就

巴縣任嘆旅骨無歸爰城東大佛寺旁擇地一區創立  
義塚為垣為墉為塋為遂區以別焉其不能収者並置  
塋分瘞之既而郡紳士龍君張君等向義樂輸同為信  
施積至七千餘金為置公田如千畝建堅室如千所歲  
給工役畚鍤以掇拾四方之不藏者觀察王公奕鴻顏  
其塋曰體仁甚盛舉也公子畊心予同西曹數年矣今  
適奉

使經過其地訪詢父老知後人奉行弗墜制日益廣澤  
日益溥是不獨公之良法美意藉以不朽而紳士之好  
行其德久而益虔足徵此邦風尚之淳而足為斯世則

傲者正未有艾畊心星驛載馳歸來告予並屬為記先  
人之惠政並以告後之莅是土居是鄉者相引勿替云

普濟堂老婦院碑記

國家惠愛黎元休養生息無微不至輦轂之下地大物博容民蓄衆尤非直省可比無告之民往往奔赴以慶更生五城招徠安插亦既各遂其性復于廣寧門外特設普濟堂歲支帑項千金米三百石為貧病老民饑粥之需其所以養所欲而給所求者至周且備乾隆四十年大司寇光山胡公奉

旨管理京尹增葺館垣經畫章程百務具舉復念哀病老婦不獲依棲未免向隅因即堂後舊址重為建房間為老婦院又計每歲薪米帛棉之費甚鉅無所出

躬自首倡輸金及公卿大夫之好義者前後積至四千  
金飭交宛平令取息為歲用蓋五年于茲矣今之鶴鳴  
婆娑羣布而曝日者皆昔之望門而裹足者也今年予  
復承

天子命攝尹事過其地悉其顛末是不可以無紀也爰  
勒碑以告後之君子俾知其由來而歲入歲出之計亦  
用以有所稽焉夫前事者後事之師創之難而守之匪  
易其何以俾前功之不隳而後効之克繼尤不能不毀  
望于賢有司矣



重修光山縣節孝祠記

乾隆四十二年歲丁酉邑侯山陰胡君莅光山甫下車  
諮詢閭閻疾苦與民更新次第興除父老頌聲予既耳  
熟聞之光之節孝祠失修近百年矣頽敝日甚地亦湫  
隘侯將謀所以鼎新而廣拓之閱二年己亥則己增購  
隣之隙地廓而大之重門疊道為堂為室為廊為廡為  
垣墉為庖廚為祭奠之位為守祠之舍鉅細畢煥然  
改觀何其整以備也既落成乃以札並繪為圖緘致都  
下以予文以記事予惟劉子政傳列女如曹如蔡不專  
以節著劉知幾識范蔚宗傳列女不當以才重先儒體

之而近代學者則又以列女非烈女專書節烈一門為失史意予竊以為不然女子德言容工惟德為重學與才皆非所急夫忠孝本也文章末也士大夫之不朽者亦在此不在彼又何論間以內乎善夫李延壽之言曰婦人主織紵中饋之事德以柔順為先乃舉其中庸未臻其極惟貞操峻節志不可奪斯無以尚豈不諒哉然則節孝者誠婦人之至行列女之上德矧其中有仰事俯畜以一身承先啓後措綱常倫紀之重且大有烈丈夫所不能為者而謂風世厲俗之道不即于是而寓歟我

國家崇寔行表幽貞歲旌節孝上自國史下逮郡邑志  
廣采博收不稍遺于荒陬僻壤碩青史筆之彤管書之  
猶恐未家喻戶曉惟專祠之設其人則近在里巷其事  
則昭著見聞而褒獎錫以

絲綸春秋隆其俎豆其揚幽光于既往維名教于方采  
者尤大彰明較著記所謂生而有德歿而祀于社者節  
孝一祠寔卿賢並重侯治光以米教化大洽茲之捐俸  
重修匪徒肅祀典安貞魂且俾此邦人士瞻棟宇而念  
松筠女有士行德乃維馨克勵節于冰霜自爭光于日  
月鬚眉丈夫亦將感慨奮興各修其孝弟忠信之德其

七錄齋文鈔

于人心風俗豈曰小補之哉光州居南北之中風尚淳  
厚士女咸務實行予既景仰幽芳而又樂賢侯之振作  
風勸于不勸也于是乎書

重修內城中街關廟記

關廟祀徧中外凡都會郡邑暨村墟井里之聚落以至  
名山巨川殊方遐島言卉服之荒且遠靡不崇稱雕  
宮以祀春秋以享伏臘重趼累繭影赴響臻者蓋二十  
餘年於茲矣我

朝徧禮羣望懷柔百神尤於 神有加禮追封三代隆  
及所自出今

皇帝尊禮靈祇以 神謚未合易名曰忠義用闡幽光  
復於封號增靈佑字載在祀典伊古以來裡祀燁赫者  
宣聖外惟神為最盛京師輦轂之下廟數百區中街一

廟敝自前明攷舊碑稱其壯麗宏偉又稱木像能屈伸  
乘馬不墮自遠徙來初祀於民舍一日汗流被面拭之  
不止有居民金惟節夜夢神恍惚若有所指因即其地  
建廟移像供其中故額曰顯聖距今凡二百年乾隆癸  
卯王觀察德卜居於是方瞻禮之餘見丹青剝落棟棟  
傾欹鳥鼠之莫禁而茂草之不除也怵然動于中爰加  
重葺塗墍黝堊閱五月而告成夫神之安於廟猶人之  
庇於宅也士民各有室廬不惜拮据以免飄搖即閭黨  
里巷之疎遇風雨不蔽者方將共謀為一椽之蔭情有  
所難忍即義有所難諉而况呵護一方沐和甘而安作

息霓旌玉節為明神所陟降而且近在尺咫之間者哉  
則茲舉也誠甚盛事工既訖觀察將勒碑以記而屬予  
為文其又何敢辭至神之取義成仁氣塞天地功在  
社稷烈炳幽明則述不勝述且人具能道之固無俟予  
之贅言也是為記

重修明楊椒山先生故宅碑記

京城宣武門外渣子橋西松筠菴故明贈太常少卿容城楊椒山先生官兵部時故宅也公之大節彪炳史策容城既有專祠清苑白溝皆立廟像惟此故宅獨以菴名何也傳聞公身後士林重公名義購其故宅建為祠春秋祀之公建之祠無常上招僧住持供灑埽之役繼流萃廡松筠名菴由來舊矣昔京師立都城隍廟凡直省城隍神主分列兩廡不知何年士庶乃以諸城隍神主列置公神座左右而好事者咸稱公為都城隍神迎像換水結會立碑喧傳百數十年不知其說之自起既



而突然迄今僧已屢易廟亦漸圯按

國家令典城隍之神與風雲雷雨山川同列通祀公之  
正氣丹心炳於星日聰明正直沒而為神於理固當即  
祀為城隍亦歿而祭社之義然典禮無徵君子弗道且  
公之精靈自在千古初不以此見奇惟久廢之後傾頽  
日甚奸僧盜鬻羣寮毀售材埴殿宇僅存柱礎脫落瓦  
礫毛角蕪穢不除士大夫過從其間相與慨然傷之乾  
隆四十九年夏楊侍御培山巡視西城李侍御春巖指  
察街道廉訪匪僧治以法更召老成住持而同時官於  
朝者倡義重修故宅於是新廟貌整辟房購復西院復

做清苑祠敬錄我

朝

御製碑文揭于楹端上以妥神下以蓄衆立為條約歲  
推司事京宦二人綱紀之於是松筠菴恢擴舊式煥著  
新觀經始於乾隆五十年乙巳之春落成於五十一年  
丙午之夏宗丞曹慕堂先生實始倡義經理其事以余  
曾始終周旋其間俾為文以記余按昔賢祠宇起於後  
人追慕而建者必擇地而施今茲故宅則公生前所常  
居處緬想芳型於斯尤切嘗讀公年譜嘉靖二十六年  
丁未年三十二歲成進士除授南京吏部主事越四年

辛亥擢兵部車駕司員外郎旋以諫阻馬市廷杖謫邊  
士子冬復遷至武選司癸丑即以劾嚴嵩下獄是前後  
居斯宅者僅一載如傳舍耳而至今人心翕然相與愛  
護保持不忍暫輟蓋公之靈爽日在天地雖烟雲草木  
一宿蘧廬猶將繫人之思於無窮矧其退食休憩之所  
曾抹香而修諫草者耶夫自明嘉靖至今僅二百年興  
廢不常已如是茲之所興詎必久遠不復頽敗然高山  
景行人有同心即今重修集事之不約而同越三年而  
鄭重如初則他日以時修葺引之勿替者又寧有異焉  
因記其顛末勒諸貞珉以覆同事之請並告後之君子

一錢莊續置新田記

歲丁未之冬馬君賁園李君璞安以兩庠灑掃會項公  
用之外歲有所積薈萃餘金續置新田一區坐落城東  
之鄉計田 頃 畝歲收租稻 百 十石素稱  
膏腴之壤旱潦無傷既與諸同事諏吉立券復繕書至  
京師告予屬為之記予惟斯會也自 先大夫創議以  
來僅同一簣之覆厯經同鄉好義之士奉行無勑鄭重  
其事至丁酉歲特置一錢莊于城東歲修不墮廟貌常  
新迄今又閱十五年復得續置此田向非諸君子精心  
合志任勞任怨而持之以恒久不變之力曷克臻此每

南中士大夫渡淮北來者咸稱吾郡風醇俗美士人讀書敦品急公義而重氣節目覩兩庠輪奐燦然常新旁及祭器樂舞次第修明大脩其所以安

先聖先賢之靈而振勵學校諸生之氣者靡不具舉嗚呼可不謂盛烈歟往者大河以南大江以北雨暘偶愆情農頑佃每藉口歲侵盜匿田租致地主所入恒不及額吾鄉郡邑守土者多大賢深悉其弊履勘得實力禁澆風勸懲互施以故主佃歡然戶有蓋藏久而大變其舊染之習矧一錢莊尤為腴產逼近城闔數十年來無擔石之虧者蓋仰荷當事循良之惠而核實彰瘡之道

得也抑又聞之比年以來漕督毓公以元勲之世曾籌  
七省之軍儲任重務繁猶以其暇日偕太守伊公屏騶  
從携文士遍覽郡城之風脉履畝而相其高下方舟以  
測其淺深濬文渠以環繞書院通水關以迅達市河上  
導其本源而下暢其尾閭俾數十百年淤澱閉塞之害  
一旦而廓清之于是青青子衿蒼髮黃髻之侶羣遊覽  
于紅橋綠浪之濱歌詠太平之風日自今以往將以塾  
斯民于奕禩之安而肇諸生以風雲之會予老矣既得  
拭目而觀德化之成而灑掃之後又得藉良友之勞績  
以告無罪于先人寧非予之厚幸也乎